

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-35-Z/19
Kakanj, 30.10.2019. godine

Z A P I S N I K

sa 35. redovne sjednice Općinskog vijeća održane 30.10.2019. godine (srijeda) i 31.10.2019. godine (četvrtak) u velikoj sali za sastanke Općinskog vijeća sa početkom u 9:00 sati (sažetak zapisnika)

Nakon intoniranja himne Bosne i Hercegovine, 35. sjednicu Općinskog vijeća otvorio je Slaven Katičić, predsjedavajući Općinskog vijeća i pozdravio prisutne.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Džemal Bećirhodžić, Mejrema Purišević, Adnan Ibrahimspahić, Izudin Hrusto, Safet Šahman, Nadina Kovač, Edin Aliefendić, Amar Selimović, Senad Alajbegović i Namir Talić **(SDA)**

Mugdin Gorak **(SBB BiH)**

Rešad Merdić, Adisa Škulj, Zerina Kovač, Fahrudin Buza (naknadno pristupio) i Mirsad Tursum (naknadno pristupio) **(S BiH)**

Ahmed Begić, Eldin Mijoč i Enes Piljug **(SDP BiH)**

Slaven Katičić i Ivica Petrović (naknadno pristupio) **(HDZ BiH)**

Elvedin Delić (naknadno pristupio) **(A-SDA)**

Nusret Muslić, Mirnes Merdić, Semir Mušija i Rizah Haračić **(samostalni vijećnici)**

Mujo Fafulić **(nacionalna manjina)**

Odsutni vijećnici: Evelin Bitić **(samostalni vijećnik)**, Muhamed Kubat **(SDA)** i Jasmin Mušanović **(SBB BiH)**

Predsjedavajući je konstatovao da je na sjednici u momentu prijave prisutno 25 vijećnika i vijećnica, te da su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Aldin Šljivo, općinski načelnik

Ferdo Mijač, sekretar Općinskog vijeća

Enver Kusić, sekretar organa uprave

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Rešad Zaimović, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurčo Kurtović, pomoćnik općinskog načelnika za imovinskopravne, geodetske poslove i katastar nekretnina

Bahrudin Arnaut, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice

Nurudin Hrusto, pomoćnik općinskog načelnika za civilnu zaštitu

Zijad Neimarlija, direktor Zavoda za planiranje i izgradnju općine Kakanj

Izviestioci, obrađivači, gosti:

Mirnes Bajtarević, direktor JP „Grijanje“ d.o.o. Kakanj
Helmina Murtić, direktorica i Mirsada Čaluk, predsjednica UO JU „Mladost“ Kakanj
Sadan Sikira, predsjednik Komisije za provođenje javnog nadmetanja-licitacije neizgrađenog građevinskog zemljišta u Kaknju

Predstavnici medija:

NTV IC Kakanj	„Naša riječ“	„Kaportal“
Radio Kakanj	„Kakanjlive“	„Klix portal“
„Kakanjske novine“	„Kakanj-x“	

Kratka saopćenja o radu sjednice i prethodnim pitanjima. U pripremi 35. sjednice Općinskog vijeća, Kolegij je razmatrao:

a) Molba MZ Kakanj II i MZ Bukovlje za izgradnju mosta i uređenje korita Zgošće

Molbu MZ Kakanj II i MZ Bukovlje za izgradnju mosta i uređenje korita Zgošće, Kolegij Općinskog vijeća dostavlja Službi za privredu, urbanizam i zaštitu okoliša i Zavodu za planiranje i izgradnju općine Kakanj na dalje razmatranje i postupanje.

b) Inicijativa Naše stranke za postavljanje dodatne javne rasvjete u ulicama Alije Izetbegovića i Rudarske

Inicijativu Naše stranke za postavljanje dodatne javne rasvjete u ulicama Alije Izetbegovića i Rudarske Kolegij Općinskog vijeća dostavlja Službi za privredu, urbanizam i zaštitu okoliša i Zavodu za planiranje i izgradnju općine Kakanj na dalje razmatranje i postupanje.

c) Inicijativa Naše stranke za izgradnju trotoara u ulici ZPO

Inicijativu Naše stranke za izgradnju trotoara u ulici ZPO Kolegij Općinskog vijeća dostavlja Službi za privredu, urbanizam i zaštitu okoliša i Zavodu za planiranje i izgradnju općine Kakanj na dalje razmatranje i postupanje.

d) Prijedlog dva člana – predstavnika radnih tijela Vijeća - u Komisiju za ocjenjivanje i odabir projekata NVO

Kolegij Općinskog vijeća Zahtjev Službe za privredu, urbanizam i zaštitu okoliša za delegiranjem dva predstavnika radnih tijela Vijeća u Komisiju za ocjenjivanje i odabir projekata nevladinih organizacija upućuje Općinskom vijeću na razmatranje.

Usvajanje zapisnika sa 34. sjednice Općinskog vijeća:

Predsjedavajući je zapisnik sa 34. sjednice Općinskog vijeća stavio na glasanje, te je isti usvojen jednoglasno sa 23 glasa za.

Komentari na dostavljene odgovore na vijećnička pitanja:

Enes Piljug: je rekao da je dobio odgovor na jedno od dva postavljena vijećnička pitanja, tačnije u odgovoru koji je dobio od Službe za privredu stoji da traženi podaci nisu kompletirani, te će odgovor na pitanje u vezi perspektive malinarstva u Kaknju dobiti na narednoj sjednici. Na drugo pitanje upućeno RMU Kakanj u vezi prašine i buke na pretovarnom sistemu PK „Vrtlište“ nije dobio odgovor, pa je tražio da se isti ponovo uputi Rudniku.

Safet Šahman: je naveo da je dobio odgovor na pitanje u vezi ugradnje neodgovarajuće pumpe za vodovod u Hrastovcu iz kojeg se vidi ko je odgovoran za projektovanje i nadzor, te je rekao da će se zalagati da se problem sa vodovodom u Hrastovcu konačno riješi.

Rizah Haračić: je rekao da nije zadovoljan odgovorom Policijske stanice Kakanj na pitanje postavljeno u vezi sprečavanja iznošenja neistinitih informacija putem društvenih mreža. U odgovoru se navodi da svi koji smatraju da su u medijima iznošene neistine o njima imaju mogućnost da u sudskoj parnici ostvare

svoju zaštitu, što je prema njegovom mišljenju rješavanje posljedica, a cilj postavljenog pitanja je bilo da policija pokuša preventivno djelovati kako bi se opisana pojava pokušala suzbiti ili barem umanjiti.

Komentari na dostavljena mišljenja na vijećničke inicijative:

Slaven Katičić: je rekao da je dobio odgovor od Službe za društvene djelatnosti i JU „Mladost“ na pitanje u vezi preispitivanja cijene, uslova i kriterija za prijem djece u vrtić, ali da se iz odgovora ne vidi da su se isti bavili preispitivanjem naprijed navedenog. Naime, dostavljeni su mu akti po kojima se postupa prilikom prijema djece, ali on to nije tražio. Naglasio je da se iz Budžeta Općine izdvajaju značajna sredstva za rad JU „Mladost“ i da je to mnogo više sredstava nego što je bio slučaj u ranijim godinama, te je rekao da smatra da postoji disbalans u visini sredstava koja se izdvajaju za djecu u vrtiću u odnosu na sredstva koja se izdvajaju za učenike i studente. Još je rekao da bi se trebalo ozbiljnije pozabaviti predmetnom tematikom, jer trenutna izdvajanja za JU „Mladost“ i visina cijene boravka djece u vrtiću nisu motivirajućeg karaktera da bi se potaklo otvaranje novih privatnih vrtića ili bi se izdvojena sredstva iz Budžeta trebala dijeliti za sve vrtiće.

Vijećnička pitanja:

Enes Piljug: je postavio pitanje zbog čega se ne poštuje postojeći dogovor između Službe za boračka pitanja Općine Kakanj i Udruženja RVI općine Kakanj oko plaćanja računa kod ortopeda i slično, odnosno zašto se ne refundiraju ta sredstva Udruženju RVI-a.

Rizah Haračić: je postavio pitanje da li je moguće da se prilikom dezinfekcije i dezinfekcije koriste sredstva učinkovita za uklanjanje žohara, obzirom da se dezinfekcija i dezinfekcija godinama provode na isti način, iako postoji potreba za korijenitom promjenom.

Zijad Neimarlija (odgovor): je rekao da općina dva puta godišnje provodi deratizaciju, a ove godine je urađena dezinfekcija i dezinfekcija nekoliko zgrada u kojima stanuju osobe koje su u stanju socijalne potrebe. Što se tiče obavljanja tog posla u svim zgradama napomenuo je da to nije zakonska obaveza niti su Budžetom Općine predviđena sredstva za te poslove. Naglasio je da je to obaveza stanara svake zgrade i da to trebaju realizovati putem kućnog savjeta i nadležnog upravitelja.

Rizah Haračić: je rekao da gotovo u svim zgradama postoje stanari koji ne žele da učestvuju u bilo kakvim zajedničkim aktivnostima, a jasno je da bez zajedničkog djelovanja se ne mogu postići željeni efekti dezinfekcije i dezinfekcije. Zbog toga je rekao da će u narednom periodu predložiti da se Općina putem Zavoda aktivnije uključi i eventualno planira dodatna sredstva kako bi se ovaj problem riješio.

Rešad Merdić: je postavio pitanje Policijskoj stanici Kakanj kojim traži da mu se dostavi informaciju o maloljetničkom prestupništvu u općini Kakanj za period 01.01.-30.09.2019. godine, te koje su mjere poduzete za povratnike u činjenu krivičnih djela.

Nusret Muslić: je postavio vijećničko pitanje koliko je infrastrukturnih projekata urađeno po MZ-a u periodu 2012-2019. godina (završeno ili djelimično završeno), koji projekti su po programima odobreni, a nisu realizovani u istom periodu (iznos i projekti koji su prenošeni u narednu godinu u periodu 2012-2019. godina) i da li su ta sredstva i dalje operativna, te na koji način se određuju prioriteta za završetak odobrenih projekata.

Predsjedavajući je konstatovao da su vijećnici Semir Mušija, Slaven Katičić, Amar Selimović i Izudin Hrusto podnijeli vijećnička pitanja bez korištenja govornice.

Semir Mušija: je postavio dva vijećnička pitanja. Prvo da li je u ovoj godini planirano zimsko održavanje dijela ulice 4. juli-naselje Barev Do (na potezu od zgrade NTV IC pa do kraja navedene ulice) i drugo da li je u ovoj godini planirana sanacija dilatacija na Mostu mladih i Mostu šehida, obzirom da je riječ o dva mosta (izlaz i ulaz u Kakanj) koja su veoma prometna, na kojima su dilatacije su u katastrofalnom stanju.

Slaven Katičić: je postavio dva vijećnička pitanja. Prvo ko je posjednik, a ko vlasnik parcele br. 342/50 k.o. Popi, na kojoj je izgrađen frizerski salon i na temelju čega je upisan u posjedovnom listu i drugo pitanje vezano za postupak harmonizacije podataka o vlasništvu u katastru nekretnina i ZK uredu

općinskog suda u Kaknju. Tražio je podatke na koliko je predmeta uložena žalba i osporen upis, koji su to predmeti, te na koji način se rješavaju ili su riješeni.

Amar Selimović: je postavio pitanje kada se namjerava pokrenuti postupak (oglas, konkurs i sl.) po stavci u Budžetu - sufinansiranje troškova doktorskog studija, obzirom da se bliži kraj kalendarske godine.

Izudin Hrusto: je postavio vijećničko pitanje kada će se objaviti konačni rezultati za općinske stipendije.

Vijećničke inicijative:

Enes Piljug: je podnio dvije vijećničke inicijative. Prva je da se izvrši zamjena znaka za ograničenje brzine na putu R-445, u području oko relaciji banja Tičići, sa sadašnjim 40 km/h da se postavi 60 km/h. Razlog za to je što se ne radi o naseljenom mjestu, te se nepotrebno usporavanje saobraćaja na tom dijelu puta, a radi se o dobro preglednom dijelu puta. Druga je da se nastavi izgradnja trotoara za pješake i postavi rasvjeta od kraja naselja Karaulsko Polje do Donjeg Kaknja duž puta R-445, a iz razloga što pješaci idu putem čime je ugrožena sigurnost svih učesnika u saobraćaju.

Safet Šahman: je podnio inicijativu da se pokuša utvrditi ko je odgovoran za izbacivanje dva kamiona građevinskog materijala u rijeku Ribnicu, pa je predložio izlazak na teren komunalne inspekcije na potezu 100 m prije skretanja za Subotinje, sve kako bi protiv počinioca bile poduzele odgovarajuće mjere.

Rešad Merdić: je podnio inicijativu da se uradi rekonstrukcija autobusnog stajališta u ulici Selima ef. Merdanovića na izlazu iz kružnog toka, a radi blizine kružnog toka i sprečavanja većih saobraćajnih gužvi i zastoja.

Rizah Haračić: je podnio vijećničku inicijativu za saniranje ceste u MZ Dumanac od područne škole zasekom Podvinje u dužini od 200 m, te da se planira asfaltiranje iste u budućnosti.

Amar Selimović: je podnio inicijativu da se u što kraćem roku izađe na teren kod kapije na ulazu u dvorište OŠ „Ahmed Muradbegović“ Bilješevo i utvrdi od strane stručnih lica gdje se trebaju postaviti usporivači brzine, te da se isti što prije postave.

Namir Talić: je podnio dvije vijećničke inicijative. Prva je da se u naselju Čatići od raskrsnice prema TE Kakanj uradi trotoar za pješake, obzirom da se radi o veoma frekventnom putu i pješaci na ovom dijelu puta nisu sigurni. Druga je da se u naselju Ivnica izgradi dječije igralište, s ciljem uklanjanja djece sa ceste, a radi se o vrlo frekventnom putu.

Izudin Hrusto: je podnio inicijativu da se u narednoj budžetskoj godini izvrši rekonstrukcija sale u OŠ „15. april“ - područna škola „Termoelektrana“.

Predsjedavajući je konstatovao da je vijećnik Semir Mušija podnio vijećničku inicijativu bez korištenja govornice.

Semir Mušija: je podnio dvije vijećničke inicijative. Prva da se planira i realizuje dodatno osvjetljenje područja oko kružnog toka u centru kod pekare Delibašić prema Sahat-kuli, jer se radi o području u užem gradskom dijelu koje je veoma loše osvijetljeno, a kroz koje svakodnevno zbog blizine škola prolazi veliki broj djece. Druga inicijativa je da se za narednu budžetsku godinu planira povećanje iznosa finansijske podrške za Košarkaški klub Kakanj, obzirom da je košarka već nekoliko godina daleko najpopularniji dvoranski sport u Kaknju koji privlači veliki broj gledatelja, a Klub bilježi zapažene rezultate.

Utvrđivanje dnevnog reda:

Predsjedavajući je napomenuo da je prijedlog dnevnog reda usaglašen na sjednici Kolegija koja je održana 23.10.2019. godine, pa je predložio dnevni red po pozivu za 35. sjednicu.

Nurčo Kurtović: je predložio da se u dnevni red 35. sjednice uvrste tačke: „Prijedlog odluke o načinu i

uslovima raspolaganja nekretninama – prodaji neposrednom pogodbom poslovnih prostora u vlasništvu Općine Kakanj“ i „Prijedlog rješenja o utvrđivanju prava vlasništva u korist JP „Elektroprivreda BiH“ d.d. Sarajevo Zavisno društvo Rudnik mrkog uglja „Kakanj“ d.o.o. Kakanj“, kao i „Izvještaj o radu Komisije za provođenje javnog nadmetanja – licitacije neizgrađenog građevinskog zemljišta u Kaknju.

Predsjedavajući je stavio na glasanje prijedlog da se u dnevni red uvrste dodatne tri tačke, što je usvojeno jednoglasno sa 22 glasa za.

Predsjedavajući je predložio da tačka 6. dnevnog reda bude „Prijedlog odluke o načinu i uslovima raspolaganja nekretninama – prodaji neposrednom pogodbom poslovnih prostora u vlasništvu Općine Kakanj“, tačka 12. „Prijedlog rješenja o utvrđivanju prava vlasništva u korist JP „Elektroprivreda BiH“ d.d. Sarajevo Zavisno društvo Rudnik mrkog uglja „Kakanj“ d.o.o. Kakanj“, a tačka 17. dnevnog reda „Izvještaj o radu Komisije za provođenje javnog nadmetanja – licitacije neizgrađenog građevinskog zemljišta u Kaknju, te bi Vijeće raspravljalo o 18. tačaka.

U raspravi po predloženom dnevnom redu nije niko učestvovao, te je Vijeće jednoglasno sa 25 glasova za, usvojilo dnevni red za 35. sjednicu.

Usvojeni dnevni red:

1. Prijedlog odluke o izmjeni i dopuni Budžeta Općine Kakanj za 2019. godinu
2. Informacija o Dokumentu okvirnog Budžeta Općine Kakanj za period 2020-2022. godine
3. Prijedlog odluke o stavljanju van snage Regulacionog plana „Ponijeri“ Kakanj
4. Prijedlog odluke o izmjeni i dopuni Programa utroška namjenskih sredstava za zaštitu okoline Općine Kakanj za 2019. godinu
5. Prijedlog odluke o izmjeni i dopuni Programa utroška sredstava od koncesionih naknada za 2019. godinu
6. Prijedlog odluke o načinu i uslovima raspolaganja nekretninama-prodaji neposrednom pogodbom poslovnih prostora u vlasništvu Općine Kakanj
7. Prijedlog odluke o imenovanju Stručne komisije za legalizaciju bespravno izgrađenih građevina i bespravnih zahvata na području općine Kakanj
8. Prijedlog odluke o dodjeli stipendija studentima i učenicima koji se školuju za deficitarna zanimanja
9. Prijedlog odluke o imenovanju općinskog pravobranioca
10. Prijedlog odluke o usvajanju Izvještaja Komisije za provođenje izbora u MZ Koprivnica
11. Prijedlog odluke o potvrđivanju rezultata izbora i dodjela mandata za članove savjeta MZ Koprivnica
12. Prijedlog rješenja o utvrđivanju prava vlasništva u korist JP „Elektroprivreda BiH“ d.d. Sarajevo Zavisno društvo Rudnik mrkog uglja „Kakanj“ d.o.o. Kakanj
13. Prijedlog rješenja o utvrđivanju prava vlasništva u korist Zejte Ećo i Belkise Ećo iz Kaknja
14. Prijedlog zaključka o davanju saglasnosti na Izvještaj o realizaciji Godišnjeg programa rada JU za predškolski odgoj i obrazovanje „Mladost“ Kakanj za školsku 2018/19 godinu
15. Prijedlog zaključka o davanju saglasnosti na Godišnji program rada JU za predškolski odgoj i obrazovanje „Mladost“ Kakanj za 2019/20 godinu
16. Prijedlog zaključka o delegiranju dva predstavnika radnih tijela Vijeća u Komisiju za ocjenjivanje i odabir projekata nevladinih organizacija
17. Izvještaj o radu Komisije za provođenje javnog nadmetanja-licitacije neizgrađenog građevinskog zemljišta u Kaknju
18. Informacija o radu Udruženja „Razvojni centar općine Kakanj“ za period januar-juni 2019. godine

Tačka 1.

Prijedlog odluke o izmjeni i dopuni Budžeta Općine Kakanj za 2019. godinu

Predlagač: Općinski načelnik

Obrađivač: Služba za finansije

Izjestilac: Džihad Berbić, pomoćnik općinskog načelnika

Stav i mišljenje: Komisija za budžet i finansije

U diskusiji su učestvovali: Eldin Mijoč, Mirsad Tursum, Mejrema Purišević, Slaven Katičić i Rizah Haračić.

Eldin Mijoč: je tražio da se u dokumentima izbjegava korištenje skraćenica i tražio je pojašnjenje istih koje su korištene u predmetnom dokumentu. Istakao je da ga interesuje stavka donacija od TC Kakanj u iznosu od 250.000,00 KM za probijanje trase puta za Brnjic. Ovo pogotovo ako se zna da još uvijek nije utvrđena trasa tog puta kroz eksploataciono polje Rudnika, pa je s toga tražio informaciju da li je to riješeno sa RMU Kakanj, te da li su riješeni imovinsko-pravni odnosi sa Rudnikom.

Džihad Berbić: je pojasnio značenje skraćenica korištenih u dokumentu, te je rekao da obzirom da je potpisan sporazum o uzgradnji puta neophodno je bilo ta sredstva predvidjeti u Budžetu, bez obzira da li će u ovoj godini ista biti realizovana.

Mirsad Tursum: je pojasnio određene stavke koje se nalaze u predloženom dokumentu, a tiču se Doma zdravlja. Tako je rekao da UZV pregled žena je uvršten u Budžet na inicijativu vijećnice Purišević, te je ta usluga uredno obavljena, kao što je i opremanje ambulante u Zgošći obavljeno zajedničkim ulaganjem od po 50.000,00 KM od strane Općine i Doma zdravlja. Ono što sa čime se ne slaže u predloženom dokumentu su sredstva za nabavku novog vozila za HMP u iznosu od 20.000,00 KM. Rekao je da je dogovoreno bilo da će iz Budžeta za tu namjenu Domu zdravlja biti transferisano 30.000,00 KM i da je procedura nabave istog pokrenuta, a prema ovom dokumentu nedostajće 10.000,00 KM, koje Dom zdravlja ne može dodatno obezbijediti obzirom da već učestvuje sa sredstvima od 30.000,00 KM.

Eldin Mijoč: je ponovo tražio da mu se pojasni značenje skraćenice UGZ i naglasio značaj pitanja u vezi dionice puta za Brnjic koja prolazi kroz PK „Vrtlište“, a koja je prethodna dionica ovoj koja bi trebala da se radi u skladu sa potpisanim sporazumom, na osnovu kojeg je TC Kakanj transferisala sredstva od 250.000,00 KM Općini Kakanj. Uz to je tražio pojašnjenje stavke UZV pregled žena koju je komentarisao vijećnik Tursum.

Mejrema Purišević: je pojasnila da je kao vijećnica podnijela amandman na Budžet da se uvrsti stavka UZV pregleda za žene općine Kakanj, koji je od strane Vijeća prihvaćen i realizovan u Domu zdravlja Kakanj, a kompletna procedura i sve aktivnosti su provedene preko Službe za društvene djelatnosti.

Tursum Mirsad: je ponovio da je inicijativa za UZV pregled žena potekla od vijećnice Purišević, koju on lično apsolutno podržava, da je tom prilikom pregledano 200 žena iz općine Kakanj, te da je zahvaljujući tom pregledu otkriveno nekoliko slučajeva oboljenja u ranoj fazi bolesti.

Slaven Katičić: je pozvao vijećnike da se izbjegne politizacija kada se radi o stvarima kao što je inicijativa vijećnice Purišević, jer se radi o zaista kvalitetnoj inicijativi i da se takve stvari trebaju podržati bez obzira od koje političke partije dolaze.

Rizah Haračić: je pohvalio aktivnosti općinske administracije u dijelu Budžeta gdje je došlo do povećanja prihoda pojedinih stavki. Naglasio je da bi se diskusija trebala voditi o dokumentu koji se nalazi u materijalu, a ne o putu za Brnjic što nije tema ove tačke dnevnog reda. Također, podržao je diskusiju vijećnika Tursuma da se za nabavu vozila za HMP obezbijedi dodatnih 10.000,00 KM odnosno ukupno 30.000,00 KM.

Eldin Mijoč: je istakao da je diskusija o putu za Brnjic direktno vezana za predmetnu tačku dnevnog reda, jer se u Budžet uvodi nova stavka koja glasi „Izgradnja dionice ceste Donji Kakanj – Kondžilo“, što je u suštini put za Brnjic.

Usljedila je pauza u radu Vijeća od 15 minuta.

Rizah Haračić: je naglasio da je njegova diskusija isključivo vezana materijale po ovoj tački dnevnog reda, jer je evidentno da je došlo do smanjenja prihoda u Budžetu zbog smenjenog prihoda sredstava ostvarenih radom TE, zbog čega su određeni rashodi koji su trebali biti podmireni iz tih sredstava morali biti prebačeni na drugi izvor finansiranja u Budžetu. Osim toga ponovio je da predmetna tačka dnevnog reda glasi „Prijedlog odluke o izmjeni i dopuni Budžeta Općine Kakanj za 2019. godinu.“

Džihad Berbić: je rekao da se prijedlog vijećnika Tursuma za povećanje iznosa za nabavku vozila za HMP na 30.000,00 KM može prihvatiti, jer se može planirati povećanje prihodi po osnovu poreza na dohodak do kojeg će evidentno doći. Što se tiče skraćenice UGZ ona predstavlja „Uređenje građevinskog zemljišta“.

Nakon diskusije Vijeće je usvojilo Odluku o izmjeni i dopuni Budžeta sa 21 glasom za, 3 protiv, bez glasova uzdržan.

Tačka 2.

Informacija o Dokumentu okvirnog Budžeta Općine Kakanj za period 2020-2022. godine

Predlagač: Općinski načelnik

Obradivač: Služba za finansije

Izjavitelj: Džihad Berbić, pomoćnik općinskog načelnika

Stav i mišljenje: Komisija za budžet i finansije

U diskusiji je učestvovao Eldin Mijoč.

Eldin Mijoč: je rekao da je u Dokumentu okvirnog Budžeta evidentno planirano povećanje broja radnika u Općini Kakanj, a poznato je da se broj stanovnika Općine smanjuje, te smatra da u tome nema logike.

Džihad Berbić: je rekao da je opravdana diskusija vijećnika Mijoča, ali po Zakonu o finansijskom upravljanju i kontroli Općina Kakanj mora imati odjel interne kontrole, koji trenutno u Općini nije formiran, ali je planiran u ovom dokumentu u skladu sa Zakonom.

Informacija o Dokumentu okvirnog Budžeta Općine Kakanj za period 2020-2022. godine je primljena k znanju sa 22 glasa za, 3 protiv i bez uzdržanih.

Tačka 3.

Prijedlog odluke o stavljanju van snage Regulacionog plana „Ponijeri“ Kakanj

Predlagač: Općinski načelnik

Obradivač: Služba za privredu, urbanizam i zaštitu okoline

Izjavitelj: Mirza Fazlić, pomoćnik općinskog načelnika

U diskusiji nije niko učestvovao i Vijeće je usvojilo Odluku o stavljanju van snage Regulacionog plana „Ponijeri“ Kakanj jednoglasno sa 24 glasa za.

Tačka 4.

Prijedlog odluke o izmjeni i dopuni Programa utroška namjenskih sredstava za zaštitu okoline Općine Kakanj za 2019. godinu

Predlagatelj: Općinski načelnik

Obradivač: Služba za privredu, urbanizam i zaštitu okoline

Izjavitelj: Mirza Fazlić, pomoćnik općinskog načelnika

U diskusiji je učestvovao Eldin Mijoč.

Eldin Mijoč: je predložio da se uz predmetnu izmjenu Programa usvoji zaključak kojim će se izvršiti ispravka Izvještaja o utrošku namjenskih sredstava za zaštitu okoline Općine Kakanj za 2018. godinu, jer je isti direktno vezan za povećanje predviđeno ovom Izmjenom i dopunom Programa za 2019. godinu.

Mirza Fazlić: je prihvatio prijedlog vijećnika Mijoča da se usvoji zaključak o ispravci Izvještaja o realizaciji Programa za 2018. godinu u dijelu koji je vezan za predmetne Izmjene i dopune Programa za 2019. godinu.

Nakon diskusije Vijeće je usvojilo Odluku o izmjeni i dopuni Programa utroška namjenskih sredstava za zaštitu okoline Općine Kakanj za 2019. godinu, uz Zaključak o ispravci Izvještaja o realizaciji Programa utroška namjenskih sredstava za zaštitu okoline iz Budžeta Općine Kakanj za 2018. godinu i usklađivanju istog sa Odlukom o izmjeni i dopuni Programa utroška namjenskih sredstava za zaštitu okoline Općine Kakanj za 2019. godinu, sa 23 glasa za, bez glasova protiv i uzdržan.

Tačka 5.

Prijedlog odluke o izmjeni i dopuni Programa utroška sredstava od koncesionih naknada za 2019. godinu

Predlagač: Općinski načelnik

Obrađivač: Zavod za planiranje i izgradnju općine Kakanj

Izjestilac: Zijad Neimarlija, direktor Zavoda

U diskusiji su učestvovali: Safet Šahman, Enes Piljug, Eldin Mijoč i Rešad Merdić.

Safet Šahman: je tražio da se briše zadnja rečenica iz obrazloženja predložene odluke, jer smatra da izgradnja puta za Brnjic ne treba da se vezuje za potpisivanje koncesionog ugovora sa Rudnikom.

Enes Piljug: je pitao koliko je koštao put Zgošća – Tršće i kada će se završiti sanacija istog, te da li će se pristupiti izgradnji dionice ceste Donji Kakanj – Kondžilo prije izgradnje brane za potrebe Rudnika. Još je pitao hoće li prva faza izgradnje puta biti završena u ovoj godini i da li su obezbjeđena sredstva za to.

Eldin Mijoč: je rekao da je predloženim izmjenama i dopunama programa predviđeno plaćanje sanacije puta za Tršće, a prema njegovom mišljenju i onome što se vidi na terenu ta sanacija nije još uvijek završena. S druge strane smatra da postoji bojazan da zbog pokrenutog klizišta na tom lokalitetu postoji može doći do presjecanja toka rijeke i stvaranja akumulacije vode, što bi u najgorem slučaju moglo dovesti do presjecanja komunikacije za mještane Tršća. Što se tiče puta za Brnjic predložio je da izgradnju tog puta ne bi trebalo vezivati za potpisivanje koncesionog ugovora sa Rudnikom, odnosno smatra da bi sredstva za taj put trebalo izdvojiti direktno iz Budžeta Općine, te je pitao da li je riješeno prethodno pitanje u vezi ovog puta, a odnosi se na potrebnu saglasnost od Rudnika za izgradnju istog.

Zijad Neimarlija: je pojasnio da se ovdje radi o Programu za 2019. godinu, te da pokretanje bilo kakvih procedura u vezi izgradnje puta za Brnjic nije moguće dok se ne obezbjeđe potrebna sredstva. Što se tiče trasiranja puta rekao je da je projektno-planskom dokumentacijom trasa izuzeta iz eksploatacionog polja i da je plan da se prva faza uradi do brane koju će Rudnik graditi, a da se po izgradnji brane trasa ustabilji kroz eksploataciono polje Rudnika. Po pitanju sanacije puta za Tršće je rekao da je Vijeće već ranije usvojilo sredstva za sanaciju klizišta od prije dvije godine, te da je ostalo još nešto radova da se završi sanacija, što bi trebalo da se izmiri iz preostalih sredstava predviđenih Programom. Rekao da je projekat za taj put rađen od strane stručnjaka i da niko nije znao da na tom lokalitetu postoji klizište dok se nije krenulo sa radovima, te da se ne može sa sigurnošću reći jesu li radovi na sanaciji konačno završeni, obzirom da se klizište može ponovo aktivirati.

Safet Šahman: je tražio pojašnjenje da li je trasa puta koja je predviđena da ide kroz eksploataciono polje Rudnika ucrtana u njihovim kartama.

Enes Piljug: je ponovio da je najbolje rješenje za izgradnju puta za Brnjic da se sredstva obezbjeđe iz drugih izvora, a ne od koncesionih naknada.

Rešad Merdić: je naglasio da je Programom od koncesionih naknada predviđeno finansiranje izgradnje puta za Brnjic. Kako je finansiranje iz tih sredstava neizvjesno predložio je da se u narednoj budžetskoj godini sredstva za taj put planiraju iz sredstava ostvarenih radom TE.

Općinski načelnik: je naglasio da je u Općini evidentan domaćinski odnos kod potrošnje sredstava, da će gotovo 80% planiranih projekata za ovu godinu biti realizovano, bez obzira na sve poteškoće oko prihoda. Naglasio je da su uredno izmirene obaveze za kredit Vodokoma, kao i da su se redovno izmirivale obaveze za stipendije, za poticaje u privredi i poljoprivredi, kao i da su uredno transferisana

sredstva sportskim klubovima. Upoznao je vijećnike da je u proteklom periodu održano niz sastanaka sa predstavnicima Rudnika i Vlade ZDK radi konačnog raspisivanja konkursa za dodjelu koncesija, te je napomenuo da je Rudnik potpisao sa Općinom sporazum kojim prihvata stavke iz Odluke o uslovima za dodjelu koncesija koja je usvojena na Vijeću. S tim u vezi izrazio je optimizam u pogledu skore realizacije zaključaka Vijeća koji se odnose na potpisivanje koncesionog ugovora, odustajanja od svih sudskih procesa po tom osnovu, kao i rješavanja svih drugih prepreka koje su prošlosti bile sporne i zbog kojih koncesioni ugovor nije bio potpisan.

Nakon diskusije Vijeće je usvojilo Odluku o izmjeni i dopuni Programa utroška sredstava od koncesionih naknada za 2019. godinu sa 22 glasa za, bez glasova protiv i 2 glasa uzdržan.

Tačka 6.

Prijedlog odluke o načinu i uslovima raspolaganja nekretninama – prodaji neposrednom pogodbom poslovnih prostora u vlasništvu Općine Kakanj

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izvjestilac: Nurčo Kurtović, pomoćnik općinskog načelnika

U diskusiji nije niko učestvovao i Vijeće je usvojilo Odluku o načinu i uslovima raspolaganja nekretninama – prodaji neposrednom pogodbom poslovnih prostora u vlasništvu Općine Kakanj jednoglasno sa 21 glasom za.

Tačka 7.

Prijedlog odluke o dodjeli stipendija studentima i učenicima koji se školuju za deficitarna zanimanja

Predlagač: Općinski načelnik

Obrađivač: Služba za društvene djelatnosti, boračka pitanja, raseljenje lica, izbjeglice i povratnike

Izvjestilac: Rešad Zaimović, pomoćnik općinskog načelnika

Stav i mišljenje: Komisija za mlade, Komisija za ljudska prava i ravnopravnost polova

U diskusiji su učestvovali: Enes Piljug, Slaven Katičić, Rizah Haračić i Eldin Mijoč.

Enes Piljug: je podržao predloženu odluku, s tim da predlaže da se u dijelu koji reguliše obavezu vraćanja stipendije briše sve navedeno osim da se stipendije vraćaju u slučaju da je stipendista dao lažne podatke da bi ostvario stipendiju ili ukoliko se utvrdi da je primao stipendiju drugog pravnog subjekta.

Slaven Katičić: je predložio da se u odluku doda još jedan član kojim bi se izdefinisalo koja su to deficitarna zanimanja za srednje škole, a koja za fakultete, te je rekao da smatra da se ne bi trebao postavljati uslov da stipendista ne koristi stipendiju od nekog drugog pravnog lica.

Rizah Haračić: je podržao prijedlog vijećnika Katičića u pogledu ograničavanja da se stipendiranje može ostvariti od strane samo jednog pravnog lica.

Eldin Mijoč: je iznio mišljenje da bi u članu 12. odluke koji govori o razlozima za povrat stipendije, trebalo izbrisati kompletnu prvu alijenu, dok bi iz druge alineje trebalo brisati prvi dio koji propisuje da se stipendija vraća ukoliko stipendista bude isključen iz obrazovne institucije.

Rešad Zaimović: je pojasnio da je članom 1. odluke propisano kako se za svaku školsku godinu utvrđuje lista deficitarnih zanimanja i da istu godišnje donosi općinski načelnik, te je pročitao utvrđenu listu deficitarnih zanimanja za tekuću školsku godinu.

Općinski načelnik: je obrazložio odredbe odluke koje govore o situacijama kada su stipendisti dužni vratiti stipendiju. Naime, rekao je da bi se brisanjem tih odredbi ostavila mogućnost za zloupotrebu odobrenih i isplaćeni stipendija, jer bi se moglo desiti da učenici ili studenti nakon što određen broj školskih godina primaju stipendiju, promjene školu ili smjer obrazovanja, a da pri tome ne bi imali

obavezu da primljena sredstva vrata. Na taj način se ne bi ostvarivala svrha ove odluke, jer u konačnici tržište rada ne bi popunili deficitarnim zanimanjima. Zbog navednih razloga smatra da bi se odluka trebala usvojiti u predloženoj formi.

Eldin Mijoč: je iskoristio pravo na poslovničku intervenciju i rekao da u sali nema kvoruma za rad Vijeća.

Nakon diskusije predsjedavajući je konstatovao da u sali Vijeća nema kvorum vijećnika što prema Poslovniku o radu Općinskog vijeća znači da se sjednica prekida, a o nastavku će vijećnici i javnost naknadno biti obavješteni.

Zasjedanje se završilo u 13:00 sati.

Nastavak 35. redovne sjednice Općinskog vijeća – 31/10/2019

Općinsko vijeće je dana 31.10.2019. godine sa početkom u 10,00 sati, održalo nastavak 35. redovne sjednice.

Kvorum

Na nastavku sjednice je bilo prisutano 23 vijećnika i vijećnice, te su se stekli uslovi za validan rad i odlučivanje Općinskoga vijeća.

Odsutni vijećnici: Muhamed Kubat, Semir Mušija, Jasmin Mušanović, Mirsad Tursum, Adisa Škulj, Ahmed Begić, Nusret Muslić i Elvedin Delić.

Nastavku sjednice pored vijećnika, prisustvovali su općinski načelnik, pomoćnici općinskog načelnika, te izvjestioci i obrađivači prema materijalima za sjednicu.

Predsjedavajući je konstatovao da je Vijeće iscrpilo raspravu po tački 7. dnevnog reda, te je istu dao na glasanje i Vijeće je sa 20 glasova za, 2 protiv, bez glasova uzdržan usvojilo Odluku o dodjeli stipendija studentima i učenicima koji se školuju za deficitarna zanimanja.

Tačka 8.

Prijedlog odluke o imenovanju općinskog pravobranioca

Predlagač: Općinski načelnik

Obrađivač: Komisija za izbor općinskog pravobranioca Općine Kakanj

Izvjestilac: Enver Kusić, predsjednik Komisije

U raspravi niko nije učestvovao pa je Vijeće jednoglasno usvojilo Odluku o imenovanju Vesne Ajanović za općinskog pravobranioca sa 22 glasa za, nakon čega je imenovana dala svečanu zakletvu.

Ja, Vesna Ajanović zaklinjem se da ću se u vršenju službe općinskog pravobranioca pridržavati Ustava i zakona Bosne i Hercegovine, Federacije Bosne i Hercegovine, Zeničko-dobojskog kantona i Statuta Općine Kakanj i da ću službu obavljati savjesno.

Tačka 9.

Prijedlog odluke o imenovanju Stručne komisije za legalizaciju bespravno izgrađenih građevina i bespravnih zahvata na području općine Kakanj

Predlagač: Općinski načelnik

Obrađivač: Služba za privredu, urbanizam i zaštitu okoline

Izvjestilac: Mirza Fazlić, pomoćnik općinskog načelnika i Edin Aliefendić, predsjednik Komisije za izbor i imenovanje

U diskusiji je učestvovao Rešad Merdić.

Rešad Merdić: je pitao da li će komisija raditi u radnom vremenu, obzirom da je odlukom predviđeno da se plaća naknada za rad u komisiji, te ukoliko ista bude radila u radnom vremenu da li će i koliko to

uticati na rad same službe u kojoj su zaposleni članovi komisije. Još je pitao na koji način će se birati peti član komisije koji treba da bude diplomirani inženjer.

Mirza Fazlić: je pojasnio da komisiji neće biti plaćen rad za predmete koji budu obrađivani u sklopu radnog vremena, te je rekao da će se peti član komisije imenovati iz reda lica koja imaju iskustva u radu komisije za tehnički prijem objekata, odnosno iz reda kandidata koji ispunjavaju propisane uslove kantonalnom odlukom.

Nakon diskusije Vijeću je predložen sljedeći sastav Stručne komisije: Mirza Fazlić – predsjednik, članovi: Nermin Aščerija, Sabina Čaluk i Asima Bjlopoljak. Petog člana (diplomirani inženjer) imenovat će općinski načelnik u zavisnosti od vrste, veličine i namjene bespravne građevine, pa je Vijeće Odluku o imenovanju Stručne komisije za legalizaciju bespravno izgrađenih građevina i bespravni zahvata na području općine Kakanj usvojilo jednoglasno sa 22 glasa za.

Predsjedavajući je predložio da se vodi objedinjena rasprava po tačkama 10. i 11. dnevnog reda, a da se glasanje obavi pojedinačno.

Tačka 10.

Prijedlog odluke o usvajanju Izvještaja Komisije za provođenje izbora u MZ Koprivnica

Tačka 11.

Prijedlog odluke o potvrđivanju rezultata izbora i dodjela mandata za članove savjeta MZ Koprivnica

Predlagač: Općinski načelnik

Obrađivač: Služba za opću upravu, radne i zajedničke poslove, lokalnu samoupravu i mjesne zajednice

Izjavitelj: Bahrudin Arnaut, pomoćnik općinskog načelnika

Nije bilo prijavljenih za diskusiju, pa je Vijeće jednoglasno sa 22 glasa za usvojilo Odluku o usvajanju Izvještaja Komisije za provođenje izbora u MZ Koprivnica, a jednoglasno sa 21 glasom za, Odluku o potvrđivanju rezultata izbora i dodjela mandata za članove savjeta MZ Koprivnica.

Tačka 12.

Prijedlog rješenja o utvrđivanju prava vlasništva u korist JP „Elektroprivreda BiH“ d.d. Sarajevo Zavisno društvo Rudnik mrkog uglja „Kakanj“ d.o.o. Kakanj

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

U diskusiji nije niko učestvovao i Vijeće je Rješenje o utvrđivanju prava vlasništva u korist JP „Elektroprivreda BiH“ d.d. Sarajevo, Zavisno društvo Rudnik mrkog uglja „Kakanj“ d.o.o. Kakanj, usvojilo jednoglasno sa 22 glasa za.

Tačka 13.

Prijedlog rješenja o utvrđivanju prava vlasništva u korist Zejte Ećo i Belkise Ećo iz Kaknja

Predlagač: Općinski načelnik

Obrađivač: Služba za imovinskopravne, geodetske poslove i katastar nekretnina

Izjavitelj: Nurčo Kurtović, pomoćnik općinskog načelnika

U diskusiji nije niko učestvovao i Vijeće je Rješenje o utvrđivanju prava vlasništva u korist Zejte Ećo i Belkise Ećo iz Kaknja usvojilo jednoglasno sa 22 glasa za.

Predsjedavajući je predložio da se vodi objedinjena rasprava po tačkama 14. i 15. dnevnog reda, a da se glasanje obavi pojedinačno.

Tačka 14.

Prijedlog zaključka o davanju saglasnosti na Izvještaj o realizaciji Godišnjeg programa rada JU za predškolski odgoj i obrazovanje „Mladost“ Kakanj za školsku 2018/19 godinu

Tačka 15.

Prijedlog zaključka o davanju saglasnosti na Godišnji program rada JU za predškolski odgoj i obrazovanje „Mladost“ Kakanj za 2019/20 godinu

Predlagač: UO JU za predškolski odgoj i obrazovanje „Mladost“ Kakanj

Obrađivač: UO JU za predškolski odgoj i obrazovanje „Mladost“ Kakanj

Izjavitelj: Helmina Murtić, direktorica JU i Mirsada Čaluk, predsjednica UO JU

U diskusiji nije niko učestvovao, pa je Vijeće usvojilo Zaključak o davanju saglasnosti na Izvještaj o realizaciji Godišnjeg programa rada JU za predškolski odgoj i obrazovanje „Mladost“ Kakanj za školsku 2018/19 godinu i Zaključak o davanju saglasnosti na Godišnji program rada JU za 2019/20 godinu sa 20 glasova za, niko protiv i 3 glasa uzdržana.

Tačka 16.

Prijedlog zaključka o delegiranju dva predstavnika radnih tijela Vijeća u Komisiju za ocjenjivanje i odabir projekata nevladinih organizacija

Obrađivač: Služba za privredu, urbanizam i zaštitu okoline

Izjavitelj: Edin Aliefendić, predsjednik Komisije za izbor i imenovanje

Edin Aliefendić: ispred Komisije za izbor i imenovanja je predložio Petrović Ivicu i Aliefendić Edina za članove Komisiju za ocjenjivanje i odabir projekata nevladinih organizacija kao predstavnike radnih tijela Vijeća.

U diskusiji je učestvovao Eldin Mijoč.

Eldin Mijoč: je rekao da smatra da je pogrešno formulisan naziv predloženog zaključka, jer se u istom kaže delegiranje dva predstavnika radnih tijela Vijeća. Istakao je da termin delegiranje ne bi u konkretnom slučaju trebalo koristiti, nego koristiti formulaciju prijedlog imenovanja predstavnika radnih tijela Vijeća. Uz to je tražio pojašnjenje koja radna tijela Vijeća predstavljaju predloženi kandidati.

Edin Aliefendić: je pojasnio da predloženi kandidati predstavljaju sva radna tijela Vijeća, a ne Komisiju za izbor i imenovanje, a izabrani su po prijedlogu klubova koji su dostavili svoje prijedloge.

Vijeće je usvojilo Zaključak kojim se Ivica Petrović i Edin Aliefendić delegiraju kao dva predstavnika radnih tijela Vijeća u Komisiju za ocjenjivanje i odabir projekata nevladinih organizacija sa 19 glasova za, 3 protiv i bez glasova uzdržan.

Tačka 17.

Izvještaj o radu Komisije za provođenje javnog nadmetanja-licitacije neizgrađenog građevinskog zemljišta u Kaknju sa prijedlogom zaključka o utvrđivanju visine naknade članovima Komisije

Predlagač: Komisije za provođenje javnog nadmetanja-licitacije neizgrađenog građevinskog zemljišta u Kaknju

Obrađivač: Služba za imovinskopravne geodetske poslove i katastar nekretnina

Izjavitelj: Sadan Sikira, predsjednik Komisije

U diskusiji nije niko učestvovao, pa je Vijeće Zaključkom usvojilo Izvještaj o radu Komisije za provođenje javnog nadmetanja-licitacije neizgrađenog građevinskog zemljišta u Kaknju sa prijedlogom visine naknade za rad članovima Komisije, jednoglasno sa 22 glasa za.

Tačka 18.

Informacija o radu Udruženja „Razvojni centar općine Kakanj“ za period januar- juni 2019. godine

Predlagač: Udruženje „Razvojni centar općine Kakanj“

Obrađivač: Udruženje „Razvojni centar općine Kakanj“

Izjavitelj: Edin Bjelopoljak, predsjednik Udruženja

Obzirom da predsjednik Udruženja nije bio prisutan sjednici, Vijeće je ovu tačku odgodilo za narednu sjednicu.

Predsjedavajući je zaključio rad 35. sjednice Općinskog vijeća u 10:45.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić